



10678



禾軒公文集卷之四

江西提學僉事翰林院編修蒲黃

神昭

意著

刑部右侍郎門人大庾劉

節校

七言詩

甲午季冬雨雪連旬公餘感觸輒賦八絕

琪花誰散滿林端一夜鍾山失翠鬟
上下清光相掩映乾坤都在畫圖間

道傍甲第是誰家金帳羊羔興正賒
棘寺郎官清透骨自敲冰片煮春茶

茫茫徒徒瘦馬衝寒敢敢憐應有閉門僵臥

者甑無炊炊突無烟

匡時事業了無成半落風塵笑此生
却羨灞橋驢背客無端風味助吟情

一雪旬餘曉暫晴晚雲旋復結濃陰
村農初喜春宜麥麥隴今嫌雪太深

寒威入夜徹吟幃布被無溫酒力微
誰念三邊征戍苦滿天風雪臥戎衣

要路諸公寵祿兼紅爐熾炭酒頻添
迂踈只合長清冷案牘時呵凍筆僉

肯山雪後可尋春欲謝微官未有因
聞道村橋梅

發看花酌酒屬何人

題進士起家卷

吳先生彥賓由省元進士拜禮部曾瞻先生題扁云云因賦此

龍頭鼻祖家聲舊又見聞孫起 盛時筆健應扛汾

水鼎才高獨占郊林枝 宸聰快覩天人策 睿眷

榮超禮樂司故物青檀今尚在繼承還為後人期

送王主事世英還朝次翰林諸公餞別聯句韻

萬里東甌駕使驂春風歸路過閩南囊中不著新增

物篋裏惟存舊 賜衫十載論心情最劇半生憂

國意猶酣還 朝若問經行俗為道流殍澤未覃

壽仙張母吳氏七十六周翠渠韻

舞袖爛如日 前慈闈尊酒 稀年長生莫問還丹

訣種得瓊芝滿石田

題仙溪遊鶴軒次周翠渠韻

林木陰森林草萋林塘一鶴獨幽栖簷端飛起茶烟

暝雲際歸來巖日低聲挾天風聞更遠舞當庭月望

還迷祗應長伴蓬仙侶誰羨趨朝候曉鷄

辛酉二月二十日晨起訪雲峰卽事

曉訪雲峰認舊蹊種松擬築蟹窩栖溪雲蕩漾浮山

足石徑峻嶒怯馬蹄紳笏久羈真自誤林泉勇退未

終迷年來頗得蒙莊趣天地蜉蝣一視齊

致仕過常思嶺蘭若和故友彭從吾韻二首

引年得請荷 清朝報答慚無尺寸勞吾道自難酬
素志愚衷空復戀青霄百年世事心俱懶兩眼雲山
興未消偶讀從吾舊題句九原無路起詩豪

鄉山動是十年思今日重過一賦詩黃菊相看如舊
識白雲未許笑塵姿烏鳴翠竹尤深處鶴立蒼松最
上枝我亦歸尋舊栖隱開尊冷看世途危

贈大田驛丞彭籍三首

安福人字經典二彭閣老之族子也

先人昔日教安成我在齋宮解裏生垂老又經司學
政安成人上囑關情

大田驛舍

偶逢君問是安成宦族孫空谷足音心自

喜平生迹異底須論

一官山館使車稀公事無多足自怡委吏乘田遺訓
在立身元不論崇卑

大田驛和林元佐地官留題韻

此地經過知幾回山靈應笑我重來吟春幽鳥寒猶
澁帶雨頑雲濕不開恤政未沾桑下餓閑愁空切杞
人懷百年賦畝餘忠在豈逐衰殘沒草萊

賀延平劉宮保得男二首次林見素韻

鬱葱佳氣紛晴霞維岳鍾英少保家湯餅筵開春意

藹沉檀香裊煖烟斜靈椿雖老尤增翠萱草從今更
着花天上麒麟重孕秀徐卿二子未須誇

劔水深蟠雙翠虬靈鍾人物軼常流光前骨相由天
定裕後休祥自已求怡養行看翻彩服蒸嘗有待薦
嘉羞百年宮保書香在繼武還修五鳳樓

壽仙溪李村菴夫婦七十次陳待徵郎中韻

高堂春酒莫辭傾此夕弧南星正明萊服頻翻娛綺
席南陔新譜入瑤笙西來王母蟠桃熟東望函關紫
氣橫壽域無涯纔七十蓬瀛還看海塵生

挽三山張濬大尹

鄉試同年歷訓導陞知饒平縣承撫率民兵勦寇卒於師

文集卷四

詩

四

四

昔年同聽鹿鳴歌浮世光陰轉眼過白髮盈顛嗟我
老黃泉無路奈君何芹宮化雨英髦盛花縣春風惠
澤多獨恨行營星遽殞鯨鯢未覩伏天戈

送郡守陳公入覲

老來送別易銷魂况復今朝別使君霖雨已看蘇赤
子餘波還喜及斯文關河白鴈秋驚夢閭闔踈星曉
奏勲後夜月明天萬里空依北極望紅雲

題張叔著桂林書院中曲水流觴次鄭東園韻

桂林風物擅幽奇此日追隨一憇之水有淵源流易
滿杯行詰曲到應遲鶯調簧管來深樹膾切銀絲出

別池浮世茲遊須盡興萬牛難挽歲華移

題鎮海朱大尹漁樵耕牧圖次翠渠韻

乾坤何處是通津謝却浮榮避俗塵
漁笛數聲芳渚暮樵歌一曲碧山春
高秋禾黍遍層隴落日牛羊歸四隣
架有琴書尊有酒何須蓬島覓仙人

題守拙卷

仙水陳熙春名其藏修之室曰守拙因以自號

高隱林泉遠市朝半生守拙臥衡茅
浮榮有分從吾好世事無機任俗嘲
穢雀讓教稱巧婦斑鳩自合寄成巢
知君妙契廉溪賦豈向清時作繫匏

送宗姪孫道進任新會教諭次同年李若虛韻

文集卷四 詩

五

年來謝却白鷗沙榮捧除書出帝家
遙想振揚文教日春風開遍杏壇花

吾家文獻自唐開未羨床頭笏滿堆
此去譽髦期不忝青氈還付與雲來

題仙溪張氏一樂堂慶壽圖

靈椿萱草並鮮妍玉樹芝蘭復滿前
共倚蓬壺看春色從教滄海變桑田

和方友允迪六十自壽詩

允迪自號履素

壽酒年年宴此晨未論腰帶縮黃銀
人無豐約閑應好事有乘除樂亦均
素履不渝從我好世途寡合任

渠頻

笑貌

紛紛華要曾何補誰謂儒冠真誤身

題周憲使公載歸來亭次壁間韻

小亭依約水晶宮四面澄波可鑑容
槐蟻夢隨殘月曙尊鱸興繞白雲重
憂時畝餘忠在結社林泉樂意濃
我欲亭中分半榻閑看孤鶴舞蒼松

挽贈監察御史董

夫婦

僉憲豫太守復之父母也

一雙白璧閱青山逝水東馳不復還
人世有天敷慶澤泉臺無路接清顏
鳳毛碧漢雙高翥鸞詒形埤屢渙
頌墓石慚予辭不斐足留潛德示人寰

送曾郎中謝病還鄉

未故

公文集卷四

詩

六

半生塵土鬢成絲謝事還家竟不疑
陶令謾因黃菊去留侯曾與赤松期
閑來軒冕應無夢到處溪山定有詩
我未別君君別我江東回首不勝思

具慶堂詩慶林季瑞稅使伉儷壽六十

木公白髮岸烏紗金母醜顏映紫霞
老眼摩挲看流轉桑田漸滿海東涯

右次林太守韻

甲子年來又一新人間還看幾回春
仙翁雲外傳消息已注長生籙

右次吳憲副韻

送望江教諭伯清先生乃兄還莆

春草夢殘勞北上松楸望斷復南歸
往來總繫綱常

重一任風塵敝客衣

兩京飄泊幾星霜却喜逢君話故鄉
潮水不知離別苦又從江上送歸航

送道士還鄉

孤蹤無礙任西東一片閑雲寄碧空
買藥斲游都市裏尋真又入故山中
蘭橈夜泛鷗邊月鐵笛晨吹鶴背風
惆悵舊遊歸未得天涯翹首送冥鴻

題怡閑卷和都察院經歷吳仲胤韻

聲利勞人鬢易斑紅塵終日走問關
始知廊廟千鍾祿不及丘園一味閑
載酒日遊花嶼上攜書時向竹林間
因君便欲辭軒冕風月平分數畝山

天軒文集卷四 詩

七

絕句二首招諸友遊東巖

一春強半雨中過節過清明日始知垂老看春知
幾度乘春不飲欲如何
細君手釀已新篘準備尋春作勝遊
明日東山修禊事不知諸友肯從不

題夏太常竹送周翠渠知廣德州

天上清卿寫竹工分明淇澳雨中取
贈君去作鄆城守德業期同衛武公

上苑琅玕高百尺天恩浩蕩飽曾沾
一枝帶得靈坡

雨洒向南州散酷炎

郡在靈南山秀中簞簞遶舍翠陰濃清貧太守庖無
肉春兩猶能赦籜龍

挽陳教授先生廷威

乾坤俯仰嘆斯文眼底何人更似君一代才名追鄭
老百年科第屈劉蕢經橫絳帳春風謁人去詩壇夕
照曛舊日林塘重過訪數聲隣笛不堪聞

挽橘泉方文謨先生

八十高年強健身西風一夜殞莊椿黎元正爾多奇
疾天地胡爲奪此人橘井泉深空自冽杏花發爲

未軒文集卷四 詩

八

誰春刀圭我亦曾蒙惠一束生芻淚滿巾

下臯雜詠

水石陰森烟月清山中事事可怡情始知世路鬧榮
辱真與浮雲一樣輕

山徑荒涼月上時郡僚奔走逐監司道人引水澆畦
罷坐燎松明改舊詩

豪氣衰年未盡降每因世事熱衷腸山莊來往惟農
父長話桑麻心自涼

十畝山田種稻梁茄秧新乞自鄰鄉雖無鍾鼎供遊
燕且免紅塵請謁忙

何處偏宜養性靈，無端野趣在林扃。
開簾猶恨前鄰樹，遮却遙山數尺青。

山莊誰道不繁華，桃李逢春解著花。
秋至未應全落莫，芙蓉新種已抽芽。

春雨初過水滿川，神祠簫鼓正祈年。
我來亦欲隨鄉俗，急典春衣入社錢。

春風一夜到桑麻，嫩葉柔枝漸次加。
曉起喜聞童穉語，新移丹荔亦萌芽。

一川桑柘隱烟霞，黃菊蒼松自一家。
更喜舍南添隙地，開渠占斷白鷗沙。

未軒文集卷四

詩

九

七

日食何須鼎肉腴，新栽杞菊已扶踈。
小池更引清溪水，春雨應添數尾魚。

殘書讀罷啓房櫳，散步東風遣病慵。
門巷脩然籬落矮，隔鄰遙見夕陽春。

未甘奔走混風塵，買斷青山學隱淪。
半麥登場蠶作繭，林泉終老未須貧。

芳村踈雨送微涼，倚杖村南看插秧。
真趣滿腔誰與語，起呼尊酒酌柴桑。

塵寰無日是安居，喜遂山林寄一區。
讀易倦來無外事，閑看梁燕哺新雛。

麗日和風雨乍過一丘一壑足婆娑薄田有粟身無
恙天地私吾亦已多

興到展書談舜禹倦來拂枕臥烟霞箇中無限悠然
趣絕勝霜臺曉放衙

性與時違事事差生涯只合付柴麻看來富貴由天
倖傳到兒孫有幾家

鄉民水旱苦相仍征斂無期立取盈我亦呼兒急稱
貸令人惆悵憶陽城

蒼松黃菊纔三畝流水柴門自一家却悔平生都失
計坐聽官鼓踏霜華

朱軒公文集卷四

詩

輞川佳勝古來稀猶欠吾莊一段奇丹荔手栽今結
實薰風滿樹絳囊垂

近日山君猛且饜踰垣入屋攫牲牢宋均不後生今
世誰遣深山滅迹逃

世途得喪見交情徑路蕭蕭草自青惟有梁間雙燕
子年年依舊訪柴扃

性癖情知與世殊祇應歸臥故山廬山中亦有經綸
事朝課耕乘夕校書

閑來事事覺從容始信山林可養慵悔殺昔年成底
事紅塵鞭馬聽朝鍾

贈三山太守唐侯廷貴

閩江縹緲漾晴波，爭似君侯惠澤多。
玉雪襟懷涵霽月，冰霜崖谷轉陽和。
閭閻不識催租吏，田野時聞擊壤歌。
聖代循良應有傳，姓名指日入編摩。

挽溫方伯琮

使君一夢躡仙蹤，閩海家家輟相春。
廊廟有人思貢禹，泉臺無路起元龍。
紫薇花底春風老，棠樹陰中草色濃。
一束生芻從此別，蜀山回首暮雲重。

題林君叔孟秀遠亭二首

前次吳時望先生韻
後次鄭廷綱內翰韻

繫馬幽亭久未旋，亭前景物各爭妍。
倚天晴翠千峰

未軒公文集卷四

詩

十

出遶郭峇烟萬井連，花影亂侵徐孺榻。
鶯聲巧和伯琴絃，因君欲買西鄰地。
風月平分過暮年。

小亭新結傍幽蹊，窸窣平臨翠篠齊。
宿雨收殘山靄濕，浮雲飛盡海天低。
樹連睥睨參差見，花隱房櫳咫尺迷。
安得筆端生五色，盡收佳景入新題。

題淵明像

典午乾坤已莫支，一官豈爲督郵辭。
壯懷激烈無由寫，盡付東籬濁酒卮。

題劉侏像

百年縱酒樂天真，荷插青山處處春。
莫恠先生終日

醉乾坤誰是獨醒人

和惠安張大尹登最高峰韻二首

海天森列總雲峰盡在僊郎眺詠中
聖主牛刀教暫試不須凝望紫宸宮

遶邑誰當第一峰
茲峰獨出萬山中
何時麾却塵寰穴
來借巖阿半畝宮

墨竹二首爲林信傳賦

誰種琅玕傍碧溪
森森高節與雲齊
春風養就林間實
留待丹山彩鳳棲

籠葱翠玉擅風標
白石清泉伴寂寥
安得伶倫裁鳳

管五雲深處和簫韶

文峰書樓爲陳文珍賦

亭亭文筆玉嶙峋
下有層樓迥出塵
四壁芸香浮汗簡
三更藜燭逼穹旻
元方別駕聲華舊
小阮黌宮教澤新
寄語雲仍宜努力
莫教家學負前人

南溪別業次韻

刺桐花下有華堂
別買溪南數畝莊
旋剪荆榛開町疇
更添亭館帶林塘
春嵐壓地苔花濕
暑雨蒸林荔子香
自笑一生纓冕累
無緣來共白雲鄉

林雲山盆梅九月盛開魏竹溪有詩次韻二首

處處有盆梅九月寒花的燦開占取孤標尋菊
將將春意入秋來天教早實調金鼎人喜揚芬蒲
栢臺三弄瑤琴豪興發未應何遜擅吟才

江南臘月見疎梅此樹高秋已盛開東閣酒醒驚雪
早羅浮夢覺訝春來西風入戶香浮几涼月當空影
浦臺欲爲花神重作賦廣平人去愧非才

下臯俱樂部

致政歸作小亭取鄒子蒲日雲
山俱是樂一毫榮辱不須驚句

十載山莊沒草萊小亭今日喜新開呼童痛洗亭前
竹要放南山翠色來

滿目雲山俱是樂古人心與我心同紛紛寵辱多憂

患真樂誰知在此中

開亭近對九龍山人在千林紫翠間造物於吾多所
靳惟應山水不吾慳

十年失脚走危途天賦吾真半已蕪今日看山亭上
坐悠然始復見真吾

亭前無地著塵氛雲外青山山外雲頗幸名途抽脚
早山靈猶未作移文

九龍山勢鬱嵯峨翠入簾櫳爽氣多讀罷殘書無一
事閑調綠綺和樵歌

亭外群山翠遶簷看山終日坐鉤簾東南天際浮雲

盡又喜壺山露一尖
列岫多情爭秀麗
野花隨意放芳妍
化工還有些兒
欠背却西淙瀑布泉

煙雲變幻多奇態
風月清妍無盡期
莫道吾亭欠華
彩天然圖畫列階墀

瀟洒林亭僅數椽
包羅風景迥無邊
夜來微雨兼秋
至徹骨清寒疑欲仙

題仙溪陸世徵活水亭次郡守丁古崖韻

亭前靜坐暗聞香
活水流花入小塘
閒說箇中長若
此幽竒不獨在春陽

未軒公文集卷四

詩

十四

庚

宣父當年嘆逝川
眼前道體浩無邊
與君說到淵微
處須向源頭一放船

慶鄭敏善先生年八十應 詔冠帶

年躋八袞未龍鍾
又沐清時寵渥隆
華髮謾添烏
帽雪醜顏不藉錦衣紅
已看敬老循周典
還見優賢有漢風
况遇聖明弘治日
蒲輪早晚召申公

送司訓鄭先生啓善之任

萬里巴川育俊髦
一身許國不辭勞
明朝無復聆

清海今日休辭醉
綠醪猿嘯溪頭驚客夢
山橫馬首

功詩豪傳經絳帳
應多暇一曲瑤琴夜月高

已未端午同吳繼學方子大諸君遊東巖二首
名途十載抱離憂此日重欣結勝遊山色不隨人事
改煙光似爲客來收底須身外論豐約且向尊前共
唱酬薄暮微涼城上路也隨時俗看龍舟

炎歊何處滌塵憂共約東山寺裏遊一鳥不鳴山更
寂千林增翠雨初收老身猶喜康強在佳節須將酌
酹酬請看群龍紛競渡誰憐野水有橫舟

題墨菊一首爲延平通守金孔深賦

楚楚黃花絕可人曉來含露色尤勻莫教輕泛柴桑
酒留取芳泉壽劍民

偶成

蕭然一室無餘物短劍孤琴是舊知閑裏偏嫌人事
擾夢中亦怯世途危久違故舊緣多病斷送光陰賴
有詩天命窮通皆一定且傾尊酒不須悲

別東巖偶成三首

東巖一到覺心清便與高僧共結盟寶地不堪今又
別山光樹色總含情

世事紛紛役此身林泉無計日相親山靈應笑今歸
去依舊胸中萬斛塵

斜陽惆悵別招提吟逐寒雲度虎溪黃鳥似知人欲

去蒼松枝上盡情啼

馬嵬三首集句

直北關山金鼓振唐杜子美英雄無策庇嬋娟詩統一朝艷

質化塵土元音薩天錫明日何人拾翠鈿元音楊鵬翼風散綵

雲飄碧落詩類苔生輦路濕蒼煙元音柯敬仲明眸皓齒今

何在唐杜子美滿眼梨花哭杜鵑詩韻

千里佳期一夕休三體詩李益空餘涕淚洒清秋光岳英華虞伯

生魂歸遼海雲迷樹元詩體要賈策夢斷江城月滿樓光岳英華

挂毛骨已隨天地老元音貫雲石江山空結古今愁元詩體要

燕秋敬燕秋敬長生殿古生青草宋蘇子瞻七夕何人望斗牛唐音李從一

木軒公文集卷四 詩

十六

五

瀟瀟疎雨響殘除光岳英華辛敬壯士吹笳慘不舒光岳英華虞伯

生白玉帳寒鴛夢絕鼓吹宋逸蒲萄衾冷夜窓虛元詩體要辛文

房碧雞祠下杜鵑呼元音虞伯生白帝城邊古木疎唐音高逵

夫海濶天高不知處唐音劉瑤蓬萊何日候僊車光岳英華釋來

復

姑蘇懷古二首集句

吳王醉處十餘里二體詩羅隱燕語鶯啼空斷腸元音李治霸

業已隨煙燼滅宋曾子固淚痕滴透碧苔香元陳剛中彩鴛靜

占銀塘水鼓吹胡宿密雨斜侵薜荔牆唐柳子厚惆悵無因見

范蠡三體詩杜牧五湖煙浪正茫茫元詩體要張翥

西施去泛五湖舟剪燈新話萬紫千紅夢已休元詩體要周石原

故國盡消龍虎氣元音陳剛中殘蟬如說古今愁元詩體要韻桂房

椒壁蕙蘭老元音胡尊生金香瑤琴鹿豕遊元詩體要韻桂房故

事悠悠不可問唐音司徒空文明往來惟見水東流唐音高遠夫

和林君時恭山居韻四首

春入池塘草色新吟邊魚鳥覺情親雨餘澗水流花

出恍惚桃源洞裏人

入夏林端荔子新開尊時與故人親有時笑傲蒼松

下閑看紅塵得意人

小槽釀出綠醪新溪叟山翁笑語親吟對黃花無別

未軒公文集卷四

詩

十七

張

事悠然塵外一閑人

萬壑千峰積雪新閑中詩酒鎮相親興來獨步溪橋

月笑與梅花作主人

題老子授尹喜道德經圖

嘆息淳風日已淪深探性命著微言當年不授關門

尹萬古誰知道德尊

題張良進履圖

天挺人豪遇下邳留侯遂作帝王師秦關百二山河

破應是胚胎進履時

題鍾呂傳道圖

傳得壺天却老方茫茫八極任翱翔頽齡若使真能
制大濟蒼生總壽康

題張詠謁陳希夷圖

墜驢大笑西歸去買斷華山一段雲浮世知心獨張
詠無邊風月欲平分

題子期聽伯牙鼓琴圖

不因鍾子獨知音山水徒然托意深千古高風招不
返傷心弗忍撫瑤琴

題扇面小景

陰陰綠樹散清涼扶醉同消夏日長一段溪山看不

未軒公文集卷四 詩

六

墨

盡浩歌相對任斜陽

題釣臺圖

光武中興網俊才先生晦迹隱蒿萊雲臺寥落成榛
莽萬古猶傳舊釣臺

挽丁通判

早擢巍科立要津復承 恩命倅南閩寸心清奪水

壺月一氣噓回寒谷春遼海不堪仙鶴去棠陰空見

碧苔新黎元借寇今無地惆悵西風淚滿巾

唐宮人題紅葉圖詩二首

芭蕉庭院獨徘徊一片秋襟鬱不開不是霜紅隨逝

水深宮何處托良媒

曉來梳就綠雲鬟踏破香苔滿院斑無限芳情共誰
說願憑紅葉到人間

鯉湖紀遊十首和先輩龔司訓韻

瘦筇吟倚上苔梯路入深林望轉迷料得仙宮應不
遠白雲深處午雞啼

清湍數里逶迤來遶向仙宮一鑑開身世分明方外
境誰言弱水隔蓬萊

泱泱泉流濺石砭青青瑤草臥僊龐道人洞裏朝元
去看院惟留鶴一雙

未軒公文集卷四

詩

十九

吳五

芒鞋遠謁洞中天只爲雙親已暮年此意群仙如洞
鑒今宵好夢願相傳

幽潭百尺衆流鍾下瞰深崖一脉通勝槩應從天地
闢人間風景迥難同

丹成人表任遨遊丹竈空存幾度秋欲丐靈丹換凡
骨不知僊子肯從否

簾捲珠宮月滿床清風細細裊爐香病軀無計堪調
攝安得還丹一粒嘗

寒流幾派瀉層湍聲撼長空去不還夜半忽驚清夢
覺却疑風雨響琅玕

山色摩空勢欲齊時聞幽鳥隔雲啼新詩吟就無窮
趣起向琅玕節下題

風光端不讓天台百尺珠簾映日開寄語道人留半
榻功名債了擬重來

送樊掌教乃兄邦本歸常山

難弟承 恩司教鐸迢迢相送入南閩客窓風雨連
床久故國椿萱入夢頻馬踏暖雲芳草路帆衝晴靄
綠楊津遙知獻壽高堂上白髮雙親滿面春

明妃詞六首

愁抱琵琶別玉除可能談笑却胡雛宮中多貯如花
未軒文集卷四 詩 二十

女勝築長城萬里餘

風起胡天滿面沙舉頭何處望中華早知身被丹青

誤但嫁巫山百姓家

長擬承恩老漢宮誰知白骨葬胡中祇緣命薄應無

怨聖主何須殺畫工

宮衣拭淚出金鑿萬里胡風拂面寒舉目不堪風土

別夢魂昨夜遶長安

胡王慰藉恩雖厚異域荒涼心自悲惟有庭前清夜

月相隨無改漢宮時

入夜單于初罷獵雲鬟強整出宮迎馬前歌管昏胡

語不似長楊舊樂聲

寄華嚴寺默堂上人詩四首

乘閑特訪默堂師何處遊方負所期林鳥潛窺山殿
供野猿偷動石枰碁碓收殘藥空漉水犬訝遊人吠
短籬欲問三生緣內事相逢未卜是何時

萬木陰中梵宇開分明人世有蓬萊濛開池藻群魚
戲點破松煙一鶴回澗水浮花雲裏出山風如雨竹
間來高僧不遇徘徊久踏遍蒼蒼滿院苔

夏日尋幽到上方清陰滿地午生涼雨過山色重重
好風度荷花陣陣香詩景百般行處有塵緣萬種坐
來忘雲衲叩遍無人見惟有殘書滿石床

未軒公文集卷之四

詩

問師飛錫遊何處自是閑雲任去留滿院幽花空冉
冉一溪流水自悠悠半生苦海無緣濟何日空門結
社遊回首城南忽相遇一尊重約醉清秋

題府學正蒙齋醫官春曉圖

泮水三春破曉時無邊和氣襲人衣研硃細滴花間
露散帙初開竹外扉壇杏影斜殘月墜雞窓聲動曙
光微人生所學惟忠孝努力相期共不違

題葡萄爲林君伯正賦

老籐偃蹇露顆懸恍惚驪龍抱珠眠只恐風雲一朝

會奮迅直上蒼蒼天

題葡萄次羅良齋韻

移根大死渡滄溟風雨園林幾晦冥
半夜月明送清影龍蛇散亂走空庭

題睡漁父圖

孤舟穩臥蘆花裏占斷滄浪一段雲
莫向江湖輕釣客太公千古樹奇勳

蒜嶺山中偶成

驛樓鼓歇曙蒼蒼行傍花陰曉露香
獨倚征鞍探勝景無邊詩思攬人腸

未軒公文集卷四 詩

錢塘懷古

鳳凰山勢翠岩堯草樹荒涼王氣銷
二帝魂歸江月冷六宮人去海天遙
英雄千古埋黃壤臺榭三春長
綠苗惟有鍾聲應似舊朝朝暮暮送寒潮

登甘露寺多景樓二首

闌干百尺倚層霄風景無端入望遙
島嶼勢從滄海斷樓臺影落碧波搖
青山遶寺自千載芳草綠城鎖
六朝弔古傷心吟未就疎鍾殘照送歸潮

江南江北景無窮都入危樓一望中
霸業荒涼天地老山河盤踞古今雄
丹陽雨至雲連樹瓜步潮平浪

拍空野鳥似知前代恨林端哀怨泣西風

赤壁詩次韻

阿瞞志欲捲群雄戰艦誰知一炬空天意欲教成鼎峙不須惆悵怨東風

金臺早行

數村行過始聞雞星斗依稀月滿溪遙想故園人正睡梅花影落小窓西

晚過涿州

青山冉冉夕陽浮綠樹微茫見涿州白鴈聲寒燕塞晚丹楓葉落薊門秋漁舟蕩漾歸江浦畫角淒涼起

未軒公文集卷四 詩

二十三

五

戍樓黃帝蚩尤俱寂寞眼前贏得水東流

過蘆溝

一水中橫斷市廛酒旗高暮綠楊煙行囊只有詩千首不畏關門索稅錢

夜夢老母因不寐偶成

別却慈親天一方夢魂夜夜遶萱堂覺來腸斷難成寐數盡更籌夜未央

癸酉仲秋得老母家書有感

慈闈一別幾寒溫冀北聞南總斷魂昨日音書憑鴈到分明珠淚滴成痕

客中秋夜

秋夜淒涼只自憐
壁蟲窓月伴愁眠
西風不識人憔悴
亂送砧聲到枕邊

寄羅公巖家親

天涯爲別幾秋冬
南望閩山思不窮
烟樹春天迷渭北
寒雲日暮起江東
鄉心最怕看明月
客夢偏驚聽斷鴻
安得相逢一攜手
論文尊酒對春風

詠菊

東籬一夜花開遍
能使秋光勝似春
香逐金風偏馥郁
色滋玉露倍精神
月中恍惚揚妃笑
雨後分明西

未軒公文集卷四 詩

十四

子顰試問顏齡端
可制殷勤摘奉白頭親

寄表姪陳宗調

鄉園數載每同歡
別後寧知會面難
尊酒無由花底共
瑤琴空憶月中彈
江南夢斷鶯聲曙
冀北魂銷鴈影寒
遙想芸窓經史暇
寒梅開處帶吟看

立春日霜降草木皆白戲成

殘臘應隨寒漏盡
新春又逐曉鍾來
天公似報春消息
亂剪瓊花到處開

立春日偶成

土牛鞭下已飛塵
律轉三陽歲復更
鳥雀亦知春信

好碧梧枝上不停聲

春日淖沱卽事

卽光武迫於王郎所渡之處

窮方三月始知春一騎尋芳淖水濱
牧笛數聲青草岸流鶯百轉綠楊津
催花細雨濕吟袖飄絮微風散
醉巾欲訪當年水合處蒼波萬頃碧粼粼

秋夜漫興

柴門半掩夜方深獨坐空庭自在吟
菊影重重侵碧檻風聲颯颯起疎林
愁懷盡付三杯酒逸興都歸一曲琴
塵世勞勞俱是客不須對景獨傷心

題陳太守抱甕亭

未軒公文集卷四 詩

十五

瓦甕澆蔬手自携漢陰老圃是吾師
靈扃春意長無恙世路機心總不知
狡兔謾勞三穴巧痴鳩甘守一巢危
願公且未投簪去坐鎮民風息險巇

園居六詠爲河南方伯豐公慶賦

水環碧帶

居旁有小河周四圍如帶

清流如帶環幽舍瀟洒無塵趣自多月上一團凝素
練風生四面颺青羅竹間自有通門處柳暗翻疑無
路過藩府正宜宣

帝德莫思漁父共高歌

農畝躬耕

環園居皆平田將爲歸老躬耕之所

遠舍茫茫百頃田深耕應可樂
堯天綠簑二月西曠
雨黃犢一犁北隴烟荷鍾長吟
過柳外蒸藜炊黍飯
林邊祇今天上需元老未許歸來學
輞川

漁磯獨釣

居東岳河岸有石磯亦
可以為歸老取適之地

圍居東畔有漁磯獨把絲綸趣
不稀兩岸烟霞長作
伴蒲川鷗鷺盡忘機興來高詠
滄浪曲心靜偏宜水
月輝此景知公常在念
明時未許解朝衣

南窓琴趣

居南有軒薰風徐來
可鼓琴以忘塵慮

南窓靜啓理瑤琴拂拂薰風入
座清十指依稀鸞鶴
舞七絃恍惚鳳凰鳴梅花香處
清吟骨白雪彈時絕

未軒公文集卷四

詩

十六

卷七

俗情解慍願麻虛舜曲坐吟黎庶樂昇平

柳岸春風

居東浴隈種柳春
風和煦可以遊息

繚繞長堤傍舍東千章綠柳裊
春風乍經樹杪晴煙
散細拂林端煖氣融藹藹柔條
低弄影輕輕柳絮亂
飄空遙知此景堪行樂應與風
雲氣象同

藕池秋月

居北有池秋深水
月相映清光可掬

藕池秋夜靜沉沉月上層霄分
外明影透青蘋遊鯉
散光臨紅蓼睡鷗鷺金波蕩漾
微風度玉鑑澄涵碧
水平對此想應心有契月同皎
潔水同清

日暮西山卽事

晚風緩步水雲村景物無端役客魂霧擁碧岑螺髻
濕風生滄海雪花翻湄州漁艇初歸浦禧水人家半
掩門獨倚長松吟未就梨花疎雨送黃昏

禧江晚眺

江頭二月草萋萋吟倚東風望欲迷日落海門煙水
暝雨收江浦樹雲低潮頭生自湄州北山勢來從禧
水西景物後人歸路晚馬蹄踏碎落花泥

登天妃廟朝天閣

扁舟乘興訪湄州獨向朝天閣上遊鐘送清聲聞兩
岸樹移寒影落中流雲開平海見譙樓潮益禧江度
客舟吟倚闌干清不斷天風吹起海門秋

遊城南靈巖寺四首

用壁間韻

偶乘清興扣禪門碧靄深中一逕分響雜梵經風入
樹暝侵色相石生雲三千佛界中天見百八鐘聲破
曉聞景物後人吟未就輕烟疎雨澹餘曛

風景無端擁寺門望中山色幾重分泉聲滿室長疑
雨樹影當窓半是雲一派禪房依澗轉數聲清磬隔
林聞靈巖一百二十寺多少樓臺鎖夕曛

古寺蒼蒼不計年到來擬結半生緣僧閑了悟空中
性地僻分明物外天蒲室香煙初起定一天花雨正

談禪因知佛法多靈異鉢水能令出白蓮

雲巖一別幾經年此日重遊亦有緣
柢樹陰森寒帶雨澗泉澄瑩碧涵天
滿窓風月供吟句半榻烟霞伴坐禪
乘興更登高處望好山四面削青蓮

奉和袁主事登甘露寺多景樓韻

飛甍百尺拱 瑤京四望無
端景象明霸業已知隨
逝水山光猶自役吟情
草分野色緣城去風引潮聲
入座清望裏天然方外境
誰言弱水隔蓬瀛

奉和袁主事登虎丘寺浮圖韻

蘇臺鹿過水空流老樹荒烟鎮
虎丘寶塔攀躋探古

未軒公文集卷四一詩

三八

迹霸圖零落使人愁
狂歌響振層霄上縱目長過萬
嶺頭倚檻俯看飛鳥過
分明身與白雲遊

奉和袁主事遊西湖韻

平湖四面遶孤峰萬頃無波一鑑空
梵宇深藏青靄裏浮圖高插白雲中
錦衣濕處沾荷露畫舫搖時漾柳風
遊遍六朝歸路晚夕陽斜抹半山紅

題扇面山水二首爲林貴實賦

碧靄深中結草廬松風入座四窓虛
山輝澤媚無窮趣疑有幽人此讀書

茅衡幾架隔遙岑萬壑嵐光結畫陰
欲抱瑤琴訪清

寒林無路白雲深

奉和姨夫方先生詠雪韻

陰雲鬢黹布遙空六出紛紛四望同萬頃月華明徹
夜一天柳絮亂飄風光涵寰宇山河外人在瓊瑤世
界中三白由來嘉瑞兆黎元又喜際年豐

題林君長榮幽居和姨夫方先生韻

綠陰深處結幽居地僻依稀隱者廬
遠舍半栽陶令菊滿窓盡積鄴侯書
踏殘庭月夜吟句斷破畦雲曉
種蔬教子暇時攜酒伴登山臨水樂何如

題扇面子猷訪戴圖

未軒公文集卷四 詩

五九一

入夜懷人思不禁衝寒一棹度山陰
興來歸去江雲暝門掩千峰積雪深

題林君惟華秋江獨釣圖和李君唐英韻

托迹滄浪識者稀海鷗汀鷺日相依
投竿一笑寒雲暝世事無心任落暉

題蘆鴈扇和李君唐英韻

相呼相喚下回塘秋水蘆花一望長
萬里雲霄身未達數聲嘹唳送斜陽

題屈原漁父問答圖

放逐江潭恨不平偶逢漁父話衷情
可憐狂楚無情

其竟使忠臣殞此生

戲題鍾馗

曾向明皇夢寐中手擒魑魅逞英雄如何不斬姦邪
首縱使胡兒入後宮

春深菊苗未發戲成

堪笑春風亦世情菊畦偏後發生仁工夫全向繁桃
李未暇分來寂寞濱

方君景大家賞菊分題得錦菊二首

繁英千疊絕鮮明列向華堂最可人綵服舞時看不
異詩囊近處認難真月中漏泄天機巧露裏分明蜀

宋軒公文集卷四

詩

二十

錦新摘泛霞觴香更好用蘄慈壽等松椿

君家盛種一籬秋錦菊還誇異品流雨裏輕搖疑戲
綵風前謾舞訝纏頭化機巧織塵難污湛露深沾色
更幽歡賞百年能幾度不妨引滿酌金甌

送同年揚君赴春闈詩

河橋梅放雨初晴榮捧鄉書上帝京藩府已推魁
八郡大廷還擬冠群英蟲吟驛館三更夢月滿蓬窓
萬里情遙想難兄相會處對床風雨酒同傾

送林君貴實赴春闈詩

久淬文鋒羨老成喜陳三策上神京馬衝寒雪闥

山遠帆掛微風浙水平
霹靂一聲龍化早扶搖萬里
鶚飛輕瓊林宴罷如相憶
白鴈南來好寄聲

題壺山惜別圖送友人周君歸三山

壺陽臘月梅花發
花下吟詩一送君
求道立殘門外雪
思親望斷嶺頭雲
旗亭此日難分手
尊酒何時更論文
明到故園如有憶
音書無惜寄來勤

澄溪清隱

友人林君伯正爲其索

久向澄溪賦考槃
白鷗獨向靜中看
四時風月歸詩興
半世功名付釣竿
遠引溪泉來稼圃
閑開竹牖看雲巒
醉鄉笑傲無餘事
一曲狂歌宇宙寬

未軒公文集卷四

詩

三

病中與鄭君思亨姜君思正索菊花二首

聞道君家菊滿籬
無由一到賞芳菲
夢魂忘却身猶病
幾度吟敲花外扉

春初卧病及秋深
籬菊闌珊碧草侵
賴有故人相愛厚
一株無惜慰憂心

謝友人惠錦菊月下白菊二株三首

今年全不見黃花
對景荒涼祗自嗟
應是秋光深遠我
賴君挽得到貧家

鮮葩燦燦吐奇芬
截得天機錦綺文
病眼摩挲吟看久
愁懷應減兩三分

繁英楚楚開寒玉應與蟾光一色清疑是羽僊初宴
罷醉飛環珮下蓬瀛

春日臥病感懷

一臥經春祗自嗟無由散步訪韶華東風似亦欺人
病吹落瓶中數朶花

首夏病中偶成

九十春光病裏過不堪佳景盡蹉跎兒童又向床前
語樹上青梅熟已多

病中立秋偶成

春初一臥歷炎暑又見新涼起天宇西風曾不憐我

未軒公文集卷四 詩

三十一

卷一

愁頻向踈櫺送寒雨

題懸崖蘸水梅

金鼎調羹未有期獨依幽谷擅清奇夜深溪月弄清
影水底分明又一枝

題扇面畫

扁舟閑傍綠楊汀濯足滄浪酒未醒鐵笛獨橫斜照
裏數聲吹與水龍聽

10678

未軒公文集卷之四

